

14 DEC 1998  
Asean-Tiba/I  
MAHATHIR TIBA UNTUK SIDANG KEMUNCAK ASEAN

Oleh: Abdul Muin Abdul Majid

HANOI, 14 Dis (Bernama) -- Perdana Menteri Datuk Seri Dr Mahathir Mohamad tiba di sini hari ini untuk menghadiri persidangan kemuncak Asean keenam bermula esok, ketika perbincangan sedang berlangsung mengenai usaha memulihkan rantau ini daripada masalah kewangan dan ekonomi yang dihadapinya.

Dr Mahathir diiringi oleh isterinya Datin Seri Dr Siti Hasmah Mohd Ali.

Perdana Menteri Kemboja Hun Sen, yang berada di sini untuk lawatan dua hari, akan mengunjungi Dr Mahathir lewat hari ini.

Kedua-dua pemimpin itu dijangka membincangkan usaha Kemboja untuk menjadi anggota Asean pada persidangan kemuncak ini.

Dr Mahathir juga dijadualkan mengunjungi Perdana Menteri Vietnam Phan Van Kai.

Khai akan mengadakan majlis makan malam tidak rasmi untuk para pemimpin Asean malam ini, dan menurut sumber-sumber, mereka akan membincangkan soal kemasukan Kemboja ke dalam pertubuhan sembilan negara itu.

Dr Mahathir juga akan mengadakan perbincangan dengan Perdana Menteri Singapura Goh Chok Tong dan Naib Presiden China Hu Jintao.

Upacara pembukaan rasmi sidang kemuncak dua hari itu akan berlangsung di Dewan Ba Dinh.

Juga dijangka tiba hari ini ialah Sultan Hassanal Bolkiah dari Brunei, Pengerusi Majlis Ketenteraman dan Pembangunan Negara Myanmar Than Shwe, Perdana Menteri Thai Chuan Leekpai, Presiden Filipina Joseph Estrada, Presiden Indonesia B.J.Habibie dan Goh.

Pemimpin tiga negara rakan dialog Asean -- China, Jepun dan Korea Selatan -- akan tiba di sini mulai esok bagi mengadakan rundingan dengan para ketua kerajaan atau ketua negara anggota Asean itu.

Ini merupakan sidang kemucak Asean yang pertama dianjurkan oleh Vietnam yang menjadi anggota pertubuhan itu pada 1995.

-- BERNAMA

MAM rn NMO